



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguintas fatschendas:

Politica da seguondas abitaziuns

Eir a Scuol es d'vantà quist tema daspö l'ultima stà fich actual. Il cussagl ha discus, insembel culla giunta da planisaziun, pussibilitats per evitar ün svilup schmasürà pro las seguondas abitaziuns e per promover abitaziuns o terrain da fabrica per indigens. La giunta prepara uossa propostas concretas.

Sarinera da S-charl, tscherna dal lö

La sarinera nu po gnir realisada al lö previs oriundamaing cun quai cha'ls uffizis chantunals nu sun perinclets cun quel. Cunter il nouv lö (plü dastrusch al cumün) haja dat opposiziun. Il cussagl ha decis da clomar aint üna sairada d'orientaziun e da discussiun cun tuot las personas pertoccas.

Plan da quartier Buorna

Il proceder per quist plan da quartier nu va inavant pervi d'üna cunvegna tanter trais proprietaris chi'd es pendent daspö november - ün exaimpel sco chi nu stuves funcziunar! Il cussagl fa tuot il pussibel per pudair publichar quist plan da quartier d'ürant quist o il prossem mais.

Plan da quartier Pütvia-Sotchà

Il cussagl ha decis l'introducziun dal plan da quartier pel territori Pütvia-Sotchà, ingio chi's rechattan tanter oter ils stabilimaints da la firma Bezzola Denoth SA.

Plan da quartier Schinnas vest, recuors

Cunter quist plan da quartier sun entrats duos recuors pervi da l'otezza da las chasas progettadas e pervi da la distanza invers las parcelas cunfinantas. Ün recuors es gnü trat inavo davo cha'l proget es gnü adattà, tschel es gnü trat inavant.

Plan da quartier Rachögna

Quist plan da quartier es da metter suot tet a temp ütil per pussibiltar a las Pendicularas Motta Naluns da fabricar dal 2009 la nouva pendiculara. Il cussagl ha decis l'access chi succeda sün vias existentas, dad üna vart nan da Chalzina, da tschella vart nan da la via da Ftan e parallel culla via da sviamaint.

Funcziun giunta da planisaziun e trafic

Las juntas da planisaziun e da trafic d'eiran gnüdas instituidas per la revisiun totala da la planisaziun 2000 fin 2004. Davo üna discussiun cullas juntas decida il cussagl da consultar quist gremi in avegnir d'ürant il proceder per plans da quartier, là ingio chi til para indichà. La funcziun centrala da la giunta da planisaziun es e resta percenter quella da cusgliar in connex cun revisiuns parzias da la planisaziun, dimena da l'orden fundamental.

Proget ouvra Clemgia II

Il cussagl cumünal sustegna il proget da l'EE-Energia Engiadina per ün'ouvra idraulica chi tira a nüz il dischlivel tanter l'Ouvra Clemgia e l'En.

Energia Engiadina

In plüssas sezzüdas, per part cul directer e culla cumischiun da l'EE ha il cussagl cumünal discus la ventura fuorma giuridica da l'Energia Engiadina (transfuormaziun in üna corporaziun dal dret public). Id es fich important da ponderar quist pass in vista a la liberalisaziun dal marchà da forz'electricca. A la EE illa nouva fuorma pudessan as participar tuot ils cumüns da l'Engiadina Bassa e garantir quattras lur interess in üna firma cumünailva. Insembel culla Corporaziun dals cumüns concessiunaris da las OEE as voula elavurar propostas.

Dumondas per lavurar la sonda

A trais patruns da fabrica ha il cussagl dat il permiss per lavurar d'ürant tschertas sondas. In duos cas as tratta da lavuors vi dals gronds fabricats i'l center dal cumün, in ün ulteriur cas da lavuors chi sun gnüdas retardadas pervi da perscrutaziuns archeologicas sülla piazza da fabrica.

Parkegi Center Augustin

Il cussagl ha tut a cogniziun dal nouv sistem da pajar illa halla da parcar dal Center Augustin (uras da parcar impè da la bariera). Ils proprietaris dal stabilimaint vaivan giavüschè e realisà quist müdamaint. La pulizia cumünala fa sün giavüschè e cunter pajamaint las controllas.

Skatepark Gurlaina

Il cussagl ha decis la sanaziun e cumplettaziun dal Skatepark Gurlaina e surdat las lavuors correspondentas a la firma Vertical Technik AG a Frenkendorf BL. Ils cuosts totals s'amuntan a ca. CHF 66'000.--, ils iniziants han pisserà per donaziuns da sponsuors ill'otezza da CHF 15'000.--. Il Skatepark es gnü inaugurà als 28 gün 2008.

Club da ballapè

Il cumün ha fat üna nouva convegno cul Club da ballapè chi regla il fit per la piazza ed il mantegnimaint. Siond cha'l fit es relativmaing favuraivel as mettan ils commembers dal CB a disposiziun per lavur voluntaria, p.ex. pel Bike Marathon. Il Club da ballapè fa üna lavur importanta per la promoziun dal sport pro'ls uffants e juvenils.

Funtana da Vi

La funtana minerala da Vi d'eira stalivada in november 2007. Sco masüra d'urgenza ha il cussagl cumünal scumandà ulteriuras perforaziuns per sondas geotermicas in quel territori. Ün stüdi dal geolog Matthias Merz ha però muossà cha'l motiv nu d'eiran las perforaziuns, dimpersè las süttinas dals ultims 5 ons. Intant s'ha la funtana darcheu recreada, la qualità sco eir la quantità da l'aua as preschaintan sco avant quist incidaint.

Restorant e disco Trü

Il restorant es darcheu gnü scrit oura per dar a fit a partir d'utuon.

Il contrat da fittanza per la disco es intant gnü prolungà fin als 31-10-2008, quai però provisoricamaing, suot la cundiziun chi vain pisserà per quietezza eir dadour il local e sül piazzal sura e cuntuorns. Schi dà üna cuntinuaziun da la fittanza a partir da november 2008 dependa medemmamaing da quistas cundiziuns. Pervi da las reclomaziuns permanentas a regard canera, gronds disturbis e vandalissem ha il cussagl cumünal decis cha a mez lunga vista nu restarà oter co da serrar la disco.

Cunvegna fliamaint staziunar CSEB

Il cussagl ha acceptà la cunvegna da prestaziun tanter il cumün e'l CSEB davart sportas per la chüra staziunara per persunas attempadas e cun bsögn da chüra. Quistas sportas sun actualmaing: la partiziun da chüra da l'Ospidal, gruppas regiunalas da chüra e fuor-mas complementaras illa chüra.

Festa da raccolta in Val Müstair

Il cumün da Scuol es invidà sco cumün giast a la festa da raccolta in Val Müstair als 5 october 2008. Il cussagl ha acceptà quist invid chi vala eir per societats, affarists e persunas privatas.

Surdattas da lavuors

Quartier Schinnas

Lavuors d'indschegner da fabrica pella progettaziun e la survagianza da las lavuors pel provedimaint d'aua e la chanelisaziun: büro d'indschegner Brem SA.

Stüdi da variantas pella senda da colliaziun per peduns Schinnas-Chalzina: büro d'indschegner Brem SA.

Quartier Plai-Stradun

Lavuors d'indschegner da fabrica pella progettaziun e la survagianza da las lavuors per l'allontanamaint da l'aua persa (incl. stüdi per eruir il quantum d'aua persa e d'aua da plövgia): büro d'indschegners Caprez SA.

Provedimaint d'aua, Foura dal Luf

Rimplazzamaint da la lingia da colliaziun tanter la vasca da masüraziun sü San Jon e la Punt Lischana, lavuors d'indschegner da fabrica (planisaziun e survagianza da fabrica): büro d'indschegners Caprez SA.

Via da Liuns

Las lavuors per fabricar oura la storta da Liuns sun gnüdas surdattas a las seguaintas firmas:

- Lavuors d'impresari: Bezzola Denoth SA
- Installaziuns sanitarias: Stecher AG
- Surtratta da la via: Implenja Bau AG
- Lavuors da serrurier: Jachen Bischoff

Siond chi sun da far daplüssas lavuors co previs surpassan ils cuosts l'import büdschettà per ca. CHF 90'000.--. Per pudair finir las lavuors amo quist on decida il cussagl da dumandar ün credit supplementar in occasiun da la radunanza cumünala dals 14 lügl 2008.

Attach Prà da Bügl

Lavuors per ün'ulteriura etappa: Heinrich Bau GmbH.

Via da god Flöna

Bezzola Denoth SA.

Palc in sala cumünala

Per motivs da sgürezza esa d'adattar il palc e l'iglüminaziun sco eir da rimplazzar la tenda. Las lavuors sun gnüdas surdattas ad üna firma specialisada, Bühnenplan Nerlich a Jona SG.

Chasa du Parc

Lavuors da planisaziun per ün'ulteriura stanza da musica: büro Castellani & Bulfoni ScRL.

Dumondas da fabrica

Il cussagl resp. la direcziun han dat ils seguaints permiss da fabrica:

- a Helena ed Erwin Hinden-Cardino per l'ingrondimaint da lur chasa in Prà da Bügl
- a l'ArenaTech SA per üna chasa d'affars e d'abitar sün parc. 2128 sper il Stradun
- a Reto Crüzer per transfuormar üna halla existenta in Sotchà in üna butia
- a Guido e Renate Christoffel per la sanaziun e l'ingrondimaint da lur chasa in Prasad-cher
- a la Società da fabrica Crastuoglia per üna chasa d'abitar in Crastuoglia Sura
- a Ruth e Philipp Gunzinger per üna chasa d'abitar in Tof
- a Miriam ed Aldo Sala per üna chasa d'abitar in Sotchà
- a la Società da fabrica Plai per üna chasa d'abitar sün parc. 527 sper il Stradun
- a la firma Rizzi AG e Jon Corsin Rizzi per üna chasa d'affar e d'abitar in Rumangiagl

Scuol, 9 lügl 2008

Il cussagl cumünal